

# En la sumbriva dal cumbat electoral

La sessiun dal cussegl grond a Puntraschigna ha effectuà in grond dumber dad intervenziuns

DAD ANDREAS CADONAU / ANR

■ **Il clima da l'Engiadin'Ota ha animà las activitads politicas da deputadas e deputads. Bunamain 30 intervenziuns parlamentaras èn vegnidas inoltradas a chaschun da la sessiun champestra a Puntraschigna l'emna passada. Il motiv da l'inflaziun parlamentara grischuna è pli probabel da chattar en il clima politic, las elecziuns naziunales 2019.** Bain è il schef da la chanzlia chantunala, *Daniel Spadin*, pir dus onns en uffizi. Tuttina ha il chancelier chantunal explitgà che ses collavuradors na possian betg sa reguardar dad ina glista talmain lunga. I sa tracta da la glista cun las incaricas e dumondas parlamentaras inoltradas a chaschun da la sessiun extra muros dal cussegl grond da l'emna passada a Puntraschigna. Na main che 21 incaricas e dumondas han deputadas e deputads deponì tar la chanzlia chantunala ed anc sis incumbensas da fracziun. Davart ils motivs da l'inflaziun parlamentara na po e na vul il schef da la chanzlia chantunala specular. Ch'il clima da la Engiadin'Ota haja fatg bain a deputadas e deputads na dubitescha Spadin betg e che la sessiun da l'avrigl dal parlament grischun è crudada en l'aua po eventualmain declerar ina part dal considerabel augment da las intervenziuns. La scheffa da la fracziun liberaldemocratica en il cussegl grond, *Vera Stiffler*, percenter vesa in auter motiv per l'augment da las activitads politicas da deputadas e deputads. Il cumbat electoral da las tschernas naziunales da l'atun proxim bitta tscheras sumbrivas er en il cussegl grond. Da quel fatg è *Stiffler* persuadida. Ed ella valitescha bleras da las intervenziuns per



La sessiun champestra a Puntraschigna ha intimà las activitads politicas da deputadas e deputads ch'han lantschà intervenziuns politicas sin nivel da record.

FOTO O. ITEM

politicamain main relevantas. Vinavant ha la scheffa da la fracziun da la pld menziunà deputadas e deputads en uffizi en l'emprima legislatura in pau sut pressiuin da sa posiziunar.

## Respunder a chaschun da la sessiun d'october

Sche la strategia da render attent a las atgnas activitads politicas entras instanzas parlamentaras en il cussegl grond sa cum-

prova è dentant intschert. Sco quai ch'il chancelier chantunal ha explitgà ha la regenza grischuna temp enfin la sessiun d'october da responder a las dumondas ed incaricas inoltradas l'emna passada. Spadin ha dentant concedì ch'i possia senz'auter capitar ch'ina u l'autra incarica vegnia tractada pli tard. La sessiun d'october dal cussegl grond succeda tranter ils 21 e 23 d'october e cumenza exact in di suenter la tscherna naziunala. La

Partida liberaldemocratica grischuna na para betg da purtar il cumbat electoral naziunal en il parlament grischun. *Stiffler* timuna la gronda fracziun cun 36 deputadas e deputads. Tuttina èn deputadas e deputads da la fracziun liberaldemocratica fitg reservads cun instanzas parlamentaras, almain pertutgant la sessiun da l'emna passada. *Stiffler* ha punctuà che mintga singul commember da la fracziun decidia en atgna cumpetenza

davart in' intervenziun persunala. La fin finala sajan deputadas e deputads elegids dal pivel ed autonomi en lur decisziuns. La sesida da fracziun avant la sessiun veglia sulet savair dals agens commembers tgi che prevedia dad inoltrar ina dumonda u incarica per la coordinaziun politica.

## Bleras incumbensas da fracziun

Da las sis intervenziuns da fracziun da l'emna passada deriva la mesadad da la pli pitschna fracziun dal cussegl grond, numnadamain da la Partida populara cun nov commembers. Duas da las actualas intervenziuns derivan da la fracziun socialdemocratica ed ina da la fracziun da la Partida cristiandemocratica. Il cumbat electoral federal sco motiv da las bleras intervenziuns nun ha il schef da la fracziun da la pps, *Jan Koch*, vulì laschar valair. Per el è la concentraziun actuala sa dada nà dal context politic. Ed el ha accentuà che l'intervenziun parlamentara saja in impurtant med politic per ina pitschna fracziun lev represchentada en las cummissiuns. E magari vegnia la fracziun da la pps era da persvader ina maioritad en il cussegl grond via las intervenziuns. Sa chapescha che las intervenziuns procuran per blera lavur a l'administraziun chantunala. Bain ha il chancelier chantunal concedì la pussaivladad dad eruir ils custs chaschunads da las intervenziuns politicas. El vesa en ina tala enumeraziun pauc senn. Spadin ha punctuà il dretg da mintga deputada è deputà dad inoltrar dumondas e stipular incaricas ed a l'obligaziun dad administraziun e regenza da sa fatschentar cun talas e formular respostas e propostas. Ina part dal giu politico.